

Uunga siunnersuut: Siusinaartumik pensionisiat pillugit Inatsisartut inatsisaata allangortinneqarnera pillugu Inatsisartut inatsisaat nr. xx, xx. xxx 2020-imeersoq (Qulaajaanerit, piginnaangorsaqqiinerit, najukkani pissutsit pissutigalugit tapiissuteqartitsigallernerit aamma Siusinaartumik pensionisiaqarnermut maalaaruteqartarfimmut maalaaruteqarsinnaaneq pillugu erseqqissaaneq)

§1

Siusinaartumik pensionisiat pillugit Inatsisartut inatsisaanni nr. 40-mi, 9. december 2015-imeersumi, kingullermik Inatsisartut inatsisaanni nr. 28, 28. november 2019-imeersumi allangortinneqartumi ima allanguisoqassaaq:

1. *Kapitali 3* ima oqaasertalerneqassaaq:

“Kapitali 3

Qulaajaanermik ingerlatsineq aamma piginnaangorsaqqiineq

§ 8. Qinnuteqartoq sulisinnaassutsimi ilaanik suli pigisaqaqqilersinnaanersoq paasiumallugu, siusinaartumik pensionisiaqalersitsinissap isummerfiginnginnerani periarfissat suliamut attuumassuteqartut tamarmik misissorneqassapput.

Imm. 2. Siusinaartumik pensionisiaqarnissamik qinnuteqartut tamarmik qulaajaaffigineqassapput. Qulaajaanermi qinnuteqartup isumalluutai misissuiffigineqassapput, qinnuteqartullu piginnaangorsaqqinnermik ingerlataqarnermigut sulisinnaassutsini tamakkerlugu sulisinnaassutsilluunniit ilaa angoqqissinnaaneraa aalajangiivigineqassaaq.

Imm. 3. Qulaajaanernut piginnaangorsaqqinnernulluunniit najuutinnginnermut aamma peqataanginnermut kinguneqartitsinissat pillugit malittarisassanik erseqqinnerusunik Naalakkersuisut aalajangersaasinnaapput.

§ 9. Sulisinnaassuseq inuup pineqartup immikkut suliniuteqarfigineqarneratigut ineriartortinneqarsinnaasoq kommunalbestyrelsip qulaajaasoqarneranut atatillugu nalilersimappagu, taava kommunalbestyrelse tamanna pillugu aalajangiissaaq qinnuteqartorlu piginnaangorsaqqinnissamut innersuullugu.

Imm. 2. Inummut ataatsimut naleqqussakkamik piginnaangorsaqqinnissamik ingerlatsineq aqutugalugu sulisinnaassuseq massakkuugallartoq ineriartortinneqarsinnaangitsaq kommunalbestyrelsip nalilerpagu, taava paasissutissat tiggummineqareersut tunngavigalugit piginnaangorsaqqinnermik ingerlatsinerup kinguartinneqarnissaa aamma siusinaartumik pensionisiaqartitsinissaq pillugu kommunalbestyrelse aalajangiissaaq. Piginnaangorsaqqinnermik ingerlatsinissap kinguartinneqarnissaa pillugu aalajangiinerup kingorna, kingusinnerpaamik ukiup 1-p qaangiunnerani, kommunalbestyrelsip suliaq nalilersoqqissavaa.

Imm. 3. Qinnuteqartoq sulisinnaassuseqanngitsoq, piffissamilu ungasinnerusumi sulisinnaassutsiminik ineriartortitsisinnaanngitsoq qulaajaanermut atatillugu uppenarsarneqarpat imaluunniit immikkorluinnaq pissutsit takutissinnaapassuk, piginnaanngorsaqqinnissaq ingerlanneqaqqaanngikkaluartoq siusinaartumik pensionisiaqartitsinissaq pillugu kommunalbestyrelse aalajangiisinnaavoq.“

2. § 13, *imm. 5*, ima oqaasertalerneqassaaq:

“*Imm. 5.* Innuttaasoq § 9 *imm. 3*-mut pineqartunut ilaappat, sulisinnaassutsip naliliiffigineqaqqinnissaa pinngitsoorneqarsinnaavoq.”

3. § 19, *imm. 1*, ima oqaasertalerneqassaaq:

“Siusinaartumik pensionisiallit §§ 15 aamma 16 malillugit siusinaartumik pensionisiaqartinneqartut maannakkorpiaq aningaasarsiat aamma siusinaartumik pensionisianut qaffasinnerpaamik akigititap akornanni nikingassummut naapertuuttumik, annerpaamik ukioq ataasikkaarlugu, tapinik tunineqarsinnaapput. Siusinaartumik pensionisialimmut pineqartumut najukkami naleqquttumik akissarsiaqarfiusumik suliffissamik nassaartoqarsinnaannginnera immikkut pineqartillugu, tamanna atuuppoq. Siusinaartumik pensionisialimmut pineqartumut naleqquttumik suliffissamik nassaarnissamut pilersitsinissamulluunniit periarfissanik misissuiuassalluni kommunalbestyrelse pisussaaffeqarpoq.”

4. § 19, *imm 3*, ima oqaasertalerneqassaaq:

”*Imm. 3.* Tapiliussamut aallaqqaataanit tunngavigineqartut atorunnaarsimappata, imaluunniit siusinaartumik pensionisiallip *imm. 2* malillugu suliffissaq innersuunneqartoq itigartippagu, *imm. 1* malillugu tapit akuersissutigineqartut atorunnaarsinneqassapput.”

5. § 39, *imm. 2*, ima oqaasertalerneqassaaq:

“*Imm 2.* §§ 12 aamma 13 malillugit sulisinnaassutsip naliliiffigineratigut naliliiffigeqqinneratigullu sulisinnaassutsimut procentip aalajangersaaffigineqarnera pillugu kommunalbestyrelsip aalajangiineri Siusinaartumik pensionisiaqarnermut maalaaruteqartarfimmut maalaarutigineqarsinnaapput. Aalajangiinnermiit sapaatit akunnerisa 6 iluanni maalaarut Siusinaartumik pensionisiaqarnermut maalaaruteqartarfimmut tunniunneqassaaq.”

6. § 39-*imi imm. 2-p* kingornagut immikkoortutut nutaatut ikkunneqassaaq:

”*Imm. 3.* Siusinaartumik pensionisiaqartitsineq pillugu sulisinnaassutsip nalilerneqarneranut aamma pissutsit allat pillugit maalaarut imaqartoq, aallaaviatigut Siusinaartumik pensionisiaqarnermut maalaaruteqartarfimmit suliarineqassaaq.”

Imm. 3 matuma kingorna *imm. 4-nngorpoq.*

7. § 43, imm. 1, oqaaseqatigiinni siullerni, aamma § 43, imm. 3-imi “§ 9, imm. 2,” ima allanngortinneqassaaq: “§ 9, imm. 3,”.

§ 2

Inatsisartut inatsisaat 1. januar 2021 atuutilissaaq.

Namminersorlutik Oqartussat, ulloq xx. xxx 2020.

Kim Kielsen